

"Naalakkersuisut sermimik imermillu avammut nioqquteqalernissamut pilersaarussiaat pillugu nassuiaat 2004-imersoq"-mut malinnaatitsissummik nassuiaammik kingusinnerpaamik UKA2017-imi saqqummiusseqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut.

(Nalunaarusiarineqartussap takussutississavai siunissami imermik sermimillu nunanut allanut nioqqutissiortalernissamut aporfiusinnaasut aammalu nunarsuarmioqatigiit niuerfissuini niuernerpalaartumik unamminarsinnaasut nalunaarsussallugit. Nalunaarusiap aamma ersersissavaa sermimik imermillu avammut niueruteqarnissamut avungangaaq pilersaarussiaq, imermik avammut niueruteqarnermi maannamut misilittagaalersimasut aallaavigalugit).

(Inatsisartunut ilaasortaq Jess Svane, Siumut)

Akissuteqaat

(Inuussutissarsiornermut, Suliffeqarnermut, Niuernermut Nunanullu Allanut Naalakkersuisoq)

Aappassaaneerneqarnera

Inuussutissarsiornermut ataatsimiititaliaq qutsaviginiarpara siunnersuummut atatillugu pitsaasumik peqqisaartumillu suliaqarsimanerannik. Maluginiarpara ataatsimiititaliap siunnersuutai sermimik imermillu avammut niueruteqartarneq pillugu periusissiamut nutaamut maanna suliarineqartumut naapertuulluartut.

2012-imi Inatsisartut nunami inuussutissarsiutinut tunngatillugu inuussutissarsiornermik siuarsaaneq pillugu inatsit nutaaq akuersissutigaat. Inatsimmi ilaapput nunami inuussutissarsiutinut tapiissuteqartarneq. Nunami inuussutissarsiutini ilaapput kiffartuussineq, takornariartitsineq, suliffissuaqarneq, niuerneq, akunnittarfeqarneq, Qarasaasiatigut IT-mik iluaquteqarneq, misigisassarsiortitsilluni takornariartitsisarneq allallu, - taamalu aamma sermimik imermillu nioqqutissiorniarluni suliniutit.

Tapiissutit ilaatigut pilersitsinernut annertusaanernullu, nioqqutissiassanik pilersaarusiornikkullu ineriartortitsinernut, niuerfinnik pilersitsinernut imaluunniit suliniutissanik ingerlatsinernut tunniunneqartarput. Suliniutit tamakkua nukittorsarniarlugit perrassarniarlugulu ingerlatsinernut, inuussutissarsiornikkut siuarsaaniarnernik siunertaqartunut Namminersorlutik Oqartussat ukiumoortumik kiffartuussinermut isumaqatigiissuteqartarput Greenland Business-imut, 7,5 mio. kr.-it missaannik aningaasartaqartumik, aallarnisaasunut siunnersuinermik ingerlatsinerannut inuussutissarsiornikkullu siuarsaaniarluni aaqqissuussinernik ingerlatsisuunerannut aningaasaliissutaasunik.

Taamalu Naalackersuisut nalilerpaat malunnaatilimmik annertussuseqartunik tapiissutissanik aningaasaliisoqartoq, immikkut aningaasaateqarfimmik 2 mio. kr.-inik aningaasartaqartumik sermimik imermillu nioqqutissiornermut suliniutinut immikkoortitaasunik pilersitsisoqarmat.

Periusissianik suliaqarnerup ingerlatseqqinneqarnerani ilaatigut immikkut sammineqassapput qanoq aaqqissuussinitsigut suli sermimik imermillu nioqqutissiorniarluni suliniutinut killiliussat pitsaangorsarsinnaanerigut, - suliniutinik nutaanik aallartitsisoqarsinnaanera siunnerfigalugu, aammali imermik nunatsinniit avammut niueruteqalivinnissaq eqqarsaatigalugu.

Suliat ingerlaqqinnissaat qilanaaraara, taamatullu Naalackersuisuniit oqaaseqarluta siunnersuut aappassaaneerneqarnissaanut tunniuppara.